

Claudio Casanova  
Tellostrasse 19  
7000 Cuera

## Ina interessanta scoperta

Ils vegnentssuenter d'in Arpagaus da Cumbel a Baden-Württemberg ella Germania che portan oz la schlatteina Arpagaus

Ina vegnentsuenter dalla Germania nata Arpagaus ei s'interessada avon entgin temps per igl antenat Benedictus Arpagaus da Cumbel che seigi egl 18avel tschentaner ius a luvrar giu a Mettenberg el Württemberg e restaus leu. Mettenberg era in vitg ella vischinonza da Biberach. Dapi 1975 fa Mettenberg part dil marcau da Biberach. Sur ils emigrants ord la Surselva che mavan giu el Schuob gia egl 18avel tschentaner dat ei strusch informaziuns. Pér cun l'entschatta dil 19avel tschentaner anflan ins talas indicaziuns els archivs sur dils emigrants giu el Schuob ed ils schuobabechers ord il Grischun.

Tenor il cudisch parochial da Cumbel ei in Benedictus naschius ils 8 da fevrer 1748 sco fegl da Joannes Arpagaus e Christina Collenberg. Dad el anflan ins suenter il batten neginas indicaziuns pli els cudischs parochials da Cumbel, in segn ch'el seigi ius naven a luvrar e buca returnaus pli a casa. Sco la informanta ord la Germania scriva ha Benedictus maridau ina Christina Derungs, scadin cass era ina emigranta ord la Lumnezia giul Schuob. Documentau ei ch'els han giu in fegl Anton ch'ei naschius ils 13-10-1787 a Mettenberg. El ei staus il bab dils Arpagaus en Germania. Oz viva leu gia la sisavla generaziun che senumna dapi l'entschatta dil 19avel tschentaner entras in errur da scriver Arpagaus. Oz ein els da casa spatitschai a Baden-Württemberg.

El cudisch „Cumbel alla porta dalla Lumnezia“ ei la historia dils Arpagaus che seigien vegni el 16avel tschentaner da Pugaus sper Breil a Cumbel descreta. En special san motivs economics esser stai la raschun per lur sromaziun da Cumbel en ils vitgs vischinonts dalla Lumnezia, da Sursaissa ed en differents vitgs dalla Foppa. Oz san ins contastar che tut las famiglias Arpagaus el Cantun Grischun ed en la Svizera hagien giu ina ga lur raxischs a Cumbel. Nunenconuschent ei entochen oz stau la sromaziun ella Germania, ina interessanta scoperta fatga egl onn 2020.

6 da mars 2020

## **Die Genealogie der Arpogaus:**

Sie ist zu finden unter dem Stamm Arpogaus Murezzi Sievi ([http://www.procumbel.ch/images/genealogias/Arpogaus\\_Murezzi\\_Sievi.ged](http://www.procumbel.ch/images/genealogias/Arpogaus_Murezzi_Sievi.ged)) bei Arpogaus Benedictus, geboren am 8. Februar 1748 in Cumbel als Sohn von Joannes Arpogaus und Christina Collenberg.

La genealogia dils Arpogaus ei d'anflar sut la lingia d'Arpogaus Murezzi Sievi ([http://www.procumbel.ch/images/genealogias/Arpogaus\\_Murezzi\\_Sievi.ged](http://www.procumbel.ch/images/genealogias/Arpogaus_Murezzi_Sievi.ged)) tier Arpogaus Benedictus, naschius ils 8 da fevrer 1748 a Cumbel sco fegl dad Joannes Arpogaus e da Christina Collenberg.